

Հայաստան-Սփիւք 5րդ Համաժողովի յարգելի մասնակիցներ,

Սուրիոյ մէջ պատերազմը կը շարունակուի: Հալէպի, Դամասկոսի, Գամիշլիի, Քեսապի եւ այլ քաղաքներու հայութիւնը կը կրէ մարդկային զոհեր ու նիւթական ծանր վնասներ: Իսոյս տալով պատերազմէն՝ հազարաւոր սուրիահայեր ապաստան կը գտնեն բազմաթիւ երկիրներու, ի շարս որոնց Լիբանանի եւ Հայաստանի մէջ: Հ.Բ.Ը.Մ.ի Կեդրոնական Վարչական Ժողովը ատենին 1 մլն. ամերիկեան տոլարի շտապ օժանդակութեան պահեստի գումար մը նշանակած էր սուրիահայութեան օգնելու նպատակով: Միութիւնը գումարներ հանգանակելու կոչով դիմած էր նաեւ սփիւքահայութեան: Այդ կոչին ընդառաջած են շատեր՝ նկատելիօրէն ւաւելցնելով այդ գումարը եւ հասցնելով շուրջ 2 միլիոն ամերիկեան տոլարի:

Հ.Բ.Ը.Մ.-ի աջակցութիւնը կ'ընթանայ 3 ուղղութեամբ՝ Սուրիա, Հայաստան, Լիբանան:

## **Սուրիա**

Միութեան մարդասիրական օգնութեան ծրագիրներուն հիմնական մասը անմիջականօրէն կը կազմակերպուի եւ կը համադրուի Հալէպի, Դամասկոսի, Ճէզիրէի եւ Ծովափի Հ.Բ.Ը.Մ.ի Արտակարգ Վիճակի մարմիններուն կողմէ, որոնք սերտօրէն կը համագործակցին Սուրիահայ Շտապ Օգնութեան եւ Վերականգնումի Մարմինին հետ, անոր տրամադրելով նիւթական թէ բարոյական ամէն աջակցութիւն: Հազարաւոր հայ ընտանիքներու եւ մանուկներու բաժնուած է սննդեղէնի տոպրակներ, կաթ, վառելանիւթ, անհրաժեշտ իրեր եւ դեղեր: Ռումբերու բեկորներէ թէ հրասանդներէ վիրաւորուած հայորդիներուն եւ կարօտեալ ընտանիքներուն ցուցաբերուած է բժշկական օգնութիւն: Կարեւոր յատկացում ըրած ենք Հալէպի Նոր Գիւղ թաղամասի տուժած մեր հայրենակիցներուն: Նպաստաբաշխումներ ըրած ենք Հասաքէի, Մալիքիէի, Տէր Զօրի եւ Ռաս ուլ Այնի հայութեան: Օգնութեան հասած ենք նաեւ թրքական սահմանին մօտ ապրող սուրիահայերուն, ժամանակաւոր բնակարաններ գտնելու: Հ.Բ.Ը.Մ.ի Գամիշլիի մասնաճիւղը ընդունած է սահմանային գիւղերէն փախուստ տուած հայեր: Նոյնիսկ պատերազմական կացութեան մէջ, սուրիահայ աշակերտներ կը շարունակեն յաճախել դպրոց: Միութեանս հիմնական խնդիրն է դպրոցը. Ի գին ամէն զոհողութեան որդեգրած ենք «Ոչ մէկ հայ աշակերտ նիւթական պատճառով դպրոցէն դուրս պիտի չմնայ» կարգախօսը:

Միութիւնը Սուրիահայութեան օգնութեան ծրագիրներ իրականացուցած է նաեւ Սուրիոյ սահմաններէն դուրս:

## **Լիբանան**

Լիբանանը առաջիններէն էր, որ ընդունած էր սուրիահայերը: Հոս անշուշտ սննդեղէնի եւ կեցութեան հարցերը հրատապ չեն, բայց կարելոր է կրթութեան հարցը: Հ.Բ.Ը.Միութիւնը նախորդ ուսումնական տարեշրջանին հոգացած է շուրջ 140 սուրիահայ աշակերտներու կրթութեան ծախսերը:

## **Հայաստան**

Հայաստանի մէջ Հ.Բ.Ը.Մ.-ի նախաձեռնութեամբ կազմուեցաւ Օժանդակ Յանձնախումբ մը, որ ժրաջան աշխատանք կատարեց Հայաստան ապաստանած հազարաւոր սուրիահայերու օգնութեան ուղղութեամբ: Սկզբանական շրջանին Հ.Բ.Ը. Միութիւնը անոնց ամսական գումար մը տրամադրեց, որ առաւելաբար օգտագործուեցաւ բնակարաններու վարձքի համար: Սուրիահայ 608 ընտանիքներ ստացան այդ նպաստը: 180 սուրիահայեր ստացած են սննդեղէնի կտրոններ: Առողջապահութեան, դեղերու, բժշկական դարմանումի եւ հրատապ վիրահատութիւններու համար 365 կարօտեալ սուրիահայեր ստացած են օգնութիւն: Դրամական օգնութեան, մշակութային ձեռնարկներու հովանաւորութեան եւ այլ օժանդակութիւններու համար նոյնպէս միջոցներ տրամադրուած են:

Նկատի ունենալով, որ սուրիահայերէն շատեր հեռացած էին իրենց տուներէն առանց իրենց հետ ունենալու ձեռնային հագուստներ, հրատապ դարձած էր զիրենք տաք հագուստով ապահովելու հարցը: Այս նպատակով «Սիրիահայերի հիմնախնդիրների համակարգման կենտրոն»-ի հետ համագործակցաբար իրականացուցած ենք տաք հագուստի բաշխումի մի քանի ծրագիրներ, որոնցմէ օգտուած են շուրջ 1500 ընտանիքներ: Այսօր ալ կը շարունակենք նպաստ, դեղ եւ բժշկական օգնութիւն տրամադրել սուրիահայերուն:

Հ.Բ.Ը.Միութիւնը կը շարունակէ իր աջակցութիւնը բերել նաեւ «Սիրիահայերի հիմնախնդիրները համակարգող կենտրոն» հասարակական կազմակերպութեան, անոր տրամադրելով գրասենեակ, ինչպէս նաեւ յանձն առնելով գրասենեակի անձնակազմի աշխատավարձերու եւ գրասենեակի պահպանման ծախսերը:

Տասնեակ սուրիահայ ընտանիքներ այժմ կը բնակին Արցախի մէջ, որոնցմէ շատեր կը զբաղին հողագործութեամբ: Այդ ընտանիքներուն աջակցելու նպատակով Հ.Բ.Ը. Միութիւնը, Չերչեան ընտանիք հիմնադրամին նուիրատուութեան շնորհիւ, նախաձեռնեց գիւղատնտեսական աջակցութեան ծրագիր մը, որով սուրիահայ մեր հայրենակիցներուն անվճար տրամադրուեցան թրաքթորներ, սերմնացաններ, պարարտանիւթերու ցրիչներ եւ այլ սարքաւորումներ: Այս ծրագիրը քաջալեր կը հանդիսանայ որ սուրիահայ ընտանիքներ բնակութիւն հաստատեն Արցախի մէջ եւ

զբաղին գիտատնտեսությամբ, մեծապես նպաստելով նաեւ Արցախի տնտեսության զարգացման:

Հայաստանի Սփիւռքի նախարարութիւնը, Հայաստանի Կրթութեան եւ Գիտութեան նախարարութիւնը, Հայկական Բարեգործական Ընդհանուր Միութիւնը եւ Գալուստ Կիւլպէնկեան Հիմնարկութիւնը անցեալ տարի կրթաթոշակներու միասնական ծրագիր մը իրականացուցին Հայաստանի բարձրագոյն եւ միջին մասնագիտական ուսումնական հաստատութիւններուն մէջ ուսանող սուրիահայ երիտասարդներու համար: Սուրիահայ 380 ուսանողներ 2013-2014 ուսումնական տարեշրջանին նպաստաւորուեցան այս ծրագրէն: Կը վստահեցնենք թէ 2014-2015 ուսումնական տարեշրջանին նոյնպէս այս ծրագիրը պիտի շարունակուի, որուն միջոցով մեր երիտասարդ հայրենակիցները պիտի կարենան իրենց ուսումը շարունակել հայրենիքի մէջ:

Հայաստան տեղափոխուած սուրիահայերու օգնութեան ծրագիրներուն համար Հ.Բ.Ը.Միութիւնը ցարդ տրամադրած է շուրջ 450 հազար ամերիկեան տոլար: Յառաջիկայ ժամանակաշրջանին համար ալ օգնութեան որոշ ծրագիրներ իրագործելու նպատակով գումարներ պիտի հայթայթենք:

Ձեր ուշադրութեան ներկայացնելով Հ.Բ.Ը. Միութեան կատարած աշխատանքները ի նպաստ սուրիահայութեան, միեւնոյն ատեն բարձր կը գնահատենք Հայաստանի կառավարութեան, Սփիւռքի նախարարութեան, Հայ Եկեղեցւոյ, բարեսիրական կազմակերպութիւններուն, հայրենակցական միութիւններուն, առանձին խումբերուն եւ անհատներուն գործադրած ճիգերը սուրիահայութեան օգնութեան ուղղութեամբ: Մենք կը կարծենք թէ այդ աշխատանքները համադրելու, կեդրոնացնելու եւ զանոնք աւելի նպատակային ու արդիւնաւոր դարձնելու հրամայականին առջեւ կը գտնուինք ազգովին: Միասնական ու համախմբեալ աշխատանքի մը անհրաժեշտութիւնը կը զգանք բոլորս:

Սուրիական շարունակուող պատերազմը, Իրաքի հայութեան անորոշ ճակատագիրը, Միջին Արեւելքի եւ Արաբական Աշխարհի կարգ մը երկիրներու մէջ տիրող կացութիւնն ու շրջանային ամպամած հորիզոնները մեզ կը ստիպեն պատրաստ ըլլալ դիմագրաւելու հաւանական աւելի ծանր կացութիւններ: Իբրեւ անկախ պետականութիւն եւ համահայկական կառոյցներ ունեցող ազգ, մենք պէտք է մեր քաղաքական, դիւանագիտական, տնտեսական ու մարդկային հզօրանքն ու միջոցները ծառայեցնենք ծրագրուած, ուսումնասիրուած ու կեդրոնացեալ աշխատանքի մը ռազմավարութեան որդեգրումին:

Շնորհակալութիւն: